

王文公全集之而谷詩存

# 種杉集

壁山王儀修元文著

## 種杉集 卷之二

王元文而谷撰

**秦楚** 丁未一月（67）

秦坑不二世，楚炬幾春秋。豈償一時事，實遺萬代羞。

**絕句** 六月

仙心佛手自家春，白雲黃芽宇宙新。不用燒丹空費力，呵成一氣足精神。  
借元遺山韻

摩詰清空太白奇，少陵沉着義山癡。性情原自隨人異，本色无邪即好詩。

**賦役** 七月

賦役誅求重，恩光盡強名。一毛都不拔，何以荅蒼生。

**集唐** 八月

暖波微淥雨濛濛，許渾井邑山川今古同。杜牧流落正憐芳意在，  
張祜百王治亂懸心中。白居易

**狂飈破鏡**

鬚眉悉見真何瑣，心志无知實至愚。風力吹開明澈樣，以人為鑒自仙夫。

**題劍南詩鈔殘本後**

劫火子遺把手中，劍南豪氣貫長虹。陽春挽繫能傷膈，肝膽輪圍定震崧。一表出師勞夢寐，十年入蜀耿奸忠。南園得失勿庸議，畢竟詩雄數放翁。

**追次鴻泰劉公自述詩韻**

三十年間一面虛，遺編追和意躊躇。已忘用舍身何樂，久慣風塵志不輸。逐利无心同隱范，知秋有術比高梧。猶能想象清吟事，煙水飄然醉五湖。

歸來遺恨隔人天，對鏡亦驚近老年。半畝春田明照影，一篙秋水力行船。紅羊劫重悲无告，赤馬蹄輕痛自憐。四韻欲成

公曉否，緒風零雨倍悽然。

### 宛村詩草題詞

少壯曾經汗漫游，奚囊收得氣橫秋。蓮花試筆何其雅，賓雁行空未免愁。風近西崑哀有託，雲深北碕悵無儔。雕蟲技小雕龍大，詩史他年此卷求。

**曲道** 重九後，自白菓村冒雨越東山薄暮微陽中達几江寓次

曲道周旋撲撲塵，雲迷漁港幸知津。登高自足清污穢，舉下還當補賤貧。秋氣已凋楊柳葉，螳螂尚阻法車輪。遙看落日楓林外，紅焰無多特地新。

### 詠史三首

**置鼓勸農** 明洪武三十年九月，令農家置鼓，侵晨聚眾田所，及時力田。

里老不勸督怠惰者罰

重農誰不欽洪武，敕令家家置皮鼓。要使力田盡及時，侵晨聚眾會田所。里老不督怠惰人，罰重或將殃其祖。食衣多事官家勞，治國如斯邁前古。勿謂政苛不知務，三皇五帝何足數。

**拔茶植桑** 宋張泳令崇陽曰，民業茶，公慮茶利厚將官榷，令拔茶植桑，

後果榷茶，他縣多失業，而崇陽歲絹百萬匹，民多致富

厚利當歸官，張公具卓識。崇陽雖業茶，拔之何足惜。不若早自異，且將桑苗植。辛勤事耘鋤，採葉可計日。試看他縣民，榷茶業即失。豈官爭民利，廟算甚周密。

**御亭論道** 明世宗御幽風亭，召李時汪全宏論曰衣帛當思織婦之勞，食粟

當念農夫之苦。時曰，皇上真知稼穡之艱難。

幽風亭前龍旂翻，君臣論道語連篇。金口甚憐耕織苦，笏對亦稱稼穡艱。幸矣大明眾黔首，受恩深重樂無邊。臣謨君誥垂千古，百世猶欣戴二天。

## 夢春辭 十月

人已中年心尚孩，回春好夢昨宵來。貝編新舐香留舌，玉環橫陳韻勝梅。駘蕩柔波長不沒，溫馨軟語久相偎。東坡早許千金價，今日萬金也大該。

## 冬至夜雨 冬月

春歸年已除，冬至日何有。晝短塵影空，夜長雨聲久。暗知陽氣升，漸送陰風走。否泰運乎天，神功端不朽。

## 光武行 夜讀後漢書，略纂史文而成

新政如斯謬託古，元元憔悴吏亦苦。亡徵已兆出群雄，炎漢中興有光武。光武人豪自幼孤，生知兵法學知書。辛勤稼穡多于仲，賣穀納交大丈夫。發難騎牛非貿貿，无私繳獲都歸眾。奇哉大勇戰昆陽，敵友八方俱震動。引過謙恭更始慚，威儀能繼漢時官。慈哀不用決黃河，睿智權道來邯鄲。燒毀千章安反側，推心置腹建功烈。萬年英主數文叔，留得典型為帝則。

## 寒詞 王次回寒詞序云：“凜尖風之透骨，感咬月之映心，多因夢後之思添出

酒邊之句，聊作秋聲豹續，以為春詠前驅。”走筆效顰，我懷如揭。臘月

彌天霧雨漸融泥，爐火通紅向最宜。新擘廣柑香膩手，一家團聚歲寒時。

江城隔岸夜相望，几水流光五丈長。不識高樓燈影下，幾人成睡幾徬徨。

去歲今宵无妄災，泥梨迦裡鬼門開。行危言遜終何用，慚愧彥方德感才。陽曆一月廿六日也

刺骨寒風逼歲除，難忘晝切到蝸居。掠光百物人神怒，獨恨窮年失故書。陽曆一月廿七日也

三春捕繫夏腥風，秋日干戈對壘中。及到冬來凶燄戢，朱家

郭解卻稱雄。

後生可畏作師難，拳腳交加眾膽寒。此日老夫親見得，朔風侵面一長歎。陽曆今歲一月廿七日事

辛苦今年送歲華，爐煙輕篆半壺茶。枝頭梅蕊朝天笑，排冑迎春漸漸花。

### 元日絕句 戊申（68）

料峭春寒客几江，臘梅又送沁脾香。十經元日千回首，無限情懷墜渺茫。

中年哀樂易傷人，況復泥犁過後身。萬象更新須努力，不隨桃李祇迎春。

### 圍棋次韻

滿目山河八陣橫，揮戈嚴馬（抱樸子謂嚴子卿馬綏明為棋聖）戰雲生。先鋒已較千回合，丈志寧拘一局枰。今日興亡俱在念，昔年風雨獨關情。入神守拙因時用（藝經云一曰入神九曰守拙），不負胸中百萬兵。

### 春遲 二月

一川煙雨阻春華，二月江城柳始芽。黃鳥不鳴茆屋靜，杖藜徐步訪山花。

杜門習靜日蹉跎，不覺春光已半過。紫色蠅聲誰管得，遙天幾點是青螺。

### 桃花扇傳奇題詞 三月

六代雲煙過眼消，桃花舞扇送南朝。垂垂一樹白門柳，猶拂青青舊板橋（總序）

野史官書儘異同，侯生畢竟出群雄。可憐袖底桃花扇，卻是香君血染紅（侯方域）

秦淮風月本無邊，寂寞潮回淡淡煙。媚香樓瑣春何處，扇底

桃花分外妍（李香君）

柳蘇笑傲楫王侯，興廢忠奸眼底收。一曲江南哀已極，相逢  
休話秣陵秋（柳敬亭，蘇昆生）

殘山剩水望中青，金粉成空腐草腥。白髮漁樵情話苦，傷神  
誰似孔云亭（孔尚任）

### 孟夏書懷四首

三春落紅樹，孟夏滿綠林。客居寡游興，袖手聽鳴禽。啾唧  
復啁哳，一一會我心。起伏周遐邇，綏急遍觀臨。一倡必眾  
和，其調各升沉。天籟本自然，誰能賞妙音。

四月春有餘，偶然成夏冷。久居客舍中，出門思小飲。村肆  
百不足，沽空仍獨醒。信步何之干，仿佛伊人影。蒹葭綠未  
蒼，涘岸多漁隱。稼穡與狩獵，何時乃平等。

久旱得雲霓，人情所共望。洪水一橫流，如何翻怨謗。先吹  
解熱風，群氓爭相向。比及傾盆下，始苦丈滌蕩。富既一洗  
空，貧亦悲得喪。一切無分別，賢愚都一樣。隻有風雨魔，  
高高乎在上。

少年不解事，閉戶蠹詩書。弱冠遭時難，和光守其愚。潛心  
遊太古，自謂免簞簋。學既天人判，遂乃失居諸。中年知要  
妙，矢志在滌除。但念前路遙，回首一長吁。

### 舊雷 五月

舊雷輟響新雷啞，水泛長江雨尚多。一望寒空雲潑墨，三思  
行迹日如梭。角杯莫問青梅熟，甕牖應憐綠竹猗。莆博不為  
為必得，此時正好聽鮮荷。

### 藍田

藍田簪屐聞狂唾，蕭寺魚燈見咒喃。負重羸牛空號虎，怨碑  
傳出誰能芟。

### 信步 六月

毒日落山西，荷華耀碧溪。天長清韻好，遠樹一蟬嘶。

### 落日

炎炎何足畏，終有下山時。浩浩長流水，奔騰萬古期。

### 苦熱喜雨 七月

落日桂樹不肯去，金流山焦光如炬。大地無端千里赤，手提天下往何處。引水且鋤東海崩，納涼力挽銀河傾。水以滌塵除涼熱，用淨六合利群生。昔日也曾肆毒惡，羿盤神弓烏頭著。而今畢竟一場空，喜看秋雨送日落。

### 種杉集

為護群生且種杉，三千世界一華嚴。森森百萬龍泉劍，先斬橫空帶尾槐。

### 己酉迎春 己酉（69）

青陽報歲除，送暖自天都。旭日千門啟，春風萬彙蘇。悠悠思往聖，落落笑今吾。莫負佳時節，江村老匹夫。

### 殘夢六首

婁門春事近何如，廿二年前此寄居。繡戶珠簾殘夢遠，漫搔短髮憶當初。

麗日柔風約最馨，稚鴻親侍荷花廳。含輝好比凌雲石，清影娟娟鏤畫屏。

雲香雪蔚小亭前，銀漢乘槎特地眠。絮語噓芬山吐月，此身疑醉復疑仙。

臨水南軒閣道西，鴛鴦偃倚月兒低。拚將所有靈和閔，輸與欣欣玳瑁筵。

香洲之頂激觀樓，倚壁方榻未掛幬。弄雨逗雲雙燕子，幾回飛入小勾留。

勿忘我草繞吳城，一路踏青指認明。地老天荒情不盡，三生靈石證茲盟。

### 端午讀騷

用國殤韻

紛素榮兮發自甲，師橘志兮大夫接。舉長劍兮冠切雲，獨姱節兮誰能先。種蘭蕙兮欲成行，或蕪穢兮其何傷。鸞為車兮虬為馬，叩帝閭兮鳴天鼓。美人醉兮黨人怒，聊逍遙兮遊九壑，哀民生兮不忘返。望郢都兮路遼遠，儀伊呂兮鄙刀弓。德既臺兮心豈懲，依彭咸兮雖不武。終耿直兮莫敢凌，折芳馨兮薦水靈。騷可風兮人亦雄。

### 國語絕句

十年前作，已佚，茲補記之，多非原詞矣。

### 周穆王

先王耀德不觀兵，謀父拳拳諫遠征。八隻鹿狼成底事，要荒不至有周輕。

### 密康公

涇上從遊疑引狼，奔來絜者亦荒唐。母慈空示滅密戒，小醜无知國以亡。

### 周厲王

不堪命矣更巫監，壅口之嚴甚壅川。畢竟有人傳目語，長流未必待三年。

利專百物神人怒，豈止榮夷欲害多。大盜出朝終敗國，永安孤影夜婆婆。

### 邵穆公

邵公留靖國人圍，以子代王是所非。驟諫不從危不懟，忠良舍此且安歸。

### 周宣王

畎畝荒蕪曠稷官，羌戎敗績豈无端。民和神媚功安在，麓壑



須當尺事看。

### 雨夜書情

何事儘丁東，虛聲撼太空。更殘猶落雨，簾靜不當風。兩鬢他年白，孤燈此夜紅。久須窓送曙，聊復布衾中。

### 獨坐 十二月十六日，用少陵韻

囂囂群動外，霜鬢暮江城。雨過山愈翠，窓明酒倍清。玉爐經七轉，蝶夢足三生。自弄无弦曲，誰人識重輕。

### 夜坐達旦 十二月十七日，用東坡韻

六合沉沉天籟寂，一宵緩緩地爐薰。唾驚鼠竊瓶中粟，筋撥灰生足下雲。漸近歲除人亦覺，潛來春氣我先聞。南窓靜待朝陽出，報喜燈花綴十分。

### 庚戌上元 庚戌（70）

新年多樂事，厥最者元宵。金吾亦弛禁，鼇山天上燒。盤空冲燄火，繞地旋高翹。球逗獅子舞，鈇噴綵龍驕。少小嘗追逐，此歡久寂寥。蹉跎身老大，心旌定不搖。深知勝必復，五行終見調。昨日雨水節，淅瀝到今朝。不聞爆字婁，收成或尚遙。蠶禾事則近，紫姑誰與招。海獺能祭魚，候雁欲凌霄。萬物一乘時，百善當自昭。

### 春望

遍坡甸甸菜花黃，屋角桃紅泛泛香。一片江村明又靜，耕耘莫負好時光。

### 示恩

大盜唆小盜，蜂擁競抄家。小盜欲易滿，少許還亦佳。大盜沒面目，乃使新爪牙。復奪所還物，半件不容賒。借問此何為，示恩我還他。

### 辛亥元旦 辛亥（71）

舊歲昨宵徂，天明萬象都。潤知春雨細，煩覺曉煙粗。老樹芽先茁，雛雞翅漸敷。運回從此始，物我兩相矜。

### 大禹 初三

斧鑿龍門事業艱，狂瀾收拾跡斑斑。千秋栩栩英雄氣，未到无毛誓不還。

### 送春 用劉敏兩蘇公唱和韻

春光過眼那能追，日已落坡剩夕暉。醞綠平橋魚欲躍，殘紅掃地蝶仍飛。九州到處炎生夏，千載由來種有機。一笛關山情不盡，繇繇遠道是耶非。

### 八九同一 酉朔也

生哀九我，銜恤十年。逝者如斯，彼蒼者天。  
十載抱瓶，江畔徜徉。升丘遠矚，山高水長。

### 偶題

五五韶齡拙政春，天緣萬里暫相親。年來老大諸緣淡，回首誰知尚悵神。

### 花朝 九月中

一肩行李萬山迎，浮梗農家不覺榮。素手分甘紅橘美，驚鴻照影綵霞明。綠簑南畝同鋤雨，翠袖東坡特放晴。今日微吟詩興足，他年回首可勝情。

### 辛亥誕辰

一輪甲子儘風濤，七七年華上鬢毛。秦楚從來饒變幻，雨雲終究滌腥臊。知非漸覺身如玉，規往何難境似桃。策後加鞭當努力，馬蹄揚起路塵高。

### 嫗樹圖

老榦叉牙立曉風，年華如水去匆匆。天涯多少行人淚，都在慈親一望中。

## 偶題

烹羊宰豕他人事，寫字吟詩我自怡。午夜不眠聊守歲，殘更雞叫憶兒時。

## 壬子元旦 壬子（72）

无詩送歲迎元日，底事无詩我自知。五十之年人老矣，不勝春意立春時。

## 春從何處來 用吳均春詠詩韻。初二

春從何處來，金蘭接玉梅。未經秦帝闕，先上楚王臺。巴水流還歇，蜀雲鎖復開。看花聊拭目，高舉掌中杯。

## 夏歌

花流水流簌簌紅，路人指點怨東風。東風无力鶯聲老，綠葉青枝无限好。掛卻網罟養巨鱗，麥秋有幸得醫貧。令人美睡黃梅雨，三伏炎天能幾許。稚子焚香一局棋，江山相對最堪怡。

## 野語

路人何野鄙，大類憂天杞。口舌固淘淘，深思誠有理。飢寒百不堪，飽暖千可已。千百原易識，當今誰責已。

## 默誦莊子

木雞十日此中平，蝶夢新來最有情。君識解衣般礴羸，誰憐跽足謬悠行。春風桃李垂垂發，秋水江湖湛湛清。一部南華真絕調，五千上友老先生。

## 感秋詞 昔余遊學江南，初至姑蘇。一日獨步城郊，有火車穿原而過，餘

音未息，煤煙尚裊，涼風適至，秋忘頓生。今秋偶念及此，而忽忽二十有六年矣。憶昔年少下東吳，豪氣崢嶸暫未除。不隨朋儔逐歌舞，江山一覽聊自娛。千古哀樂都无似，仰天翹首獨長吁。穿原火車去何急，惟留青煙半縷孤。涼風生袖感秋意，俯仰時移世已

殊。石首本是水中物，至秋猶然化為鳧。眾星漫說拱北斗，月華如錦雲捧珠。龍山落帽亦何放，白衣送酒亦何都。年年秋來秋又去，幾回真個佩茱萸。除晦添香終有日，涸轍何妨且沫濡。

### 壬子冬興

溪水欲冰野草枯，日斜山路朔風呼。居人袖手階前立，閑看匆匆走腳夫。

圍爐夜永好談天，翠袖明燈一笑嫣。三十年前空化蝶，而今爐火卻堪憐。

食蔗從巔甜有序，剖柑先蒂快無倫。老來不作春婆夢，歲暮猶當為腹辛。

### 歎二毛 癸丑五月（73）

衰年堪歎二毛生，此意咸同弟與兄。攬轡服牛安用馬，馮河暴虎且騎鯨。雲霓渴望通鄉社，風雨頻興自帝城。三尺龍泉騰劍鋏，紛紛四海亦人情。

### 贈內

與子結縭二十年，勞生何補共連遭。孟光眉案春長好，李湓城書事可憐。嘯詠喜多雀覲子，退歸恨少鄭遨田。人間憂樂誰能問，留得童顏便是仙。

### 蛙聲 枕上聽蛙，一倡眾和，時間時停。清夜不寐，口占二絕抒情。甲寅（74）

一蛙閣閣眾蛙賡，先後高低辨不清。可惜韶光輕棄擲，年年都在聽蛙聲。

宵來倚枕待晨曦，繞耳鳴蛙漫鼓吹。忽寂忽喧遐又邇，可憐此調太參差。

### 昆侖

昆侖八駿久奔騰，弱水橫波進未能。豪氣山移前兩座，癡心

樓建第三層。雌風潛起青蘋末，絕壑難為碧浪澄。玉樹後庭歌不足，會將篝火續明燈。

**寄樂蜀僑** 十一月十六日

水泉冥動虎多情，律運玄英鶡不鳴。是處蠟梅香徹骨，江南枝上定崢嶸。

朔風哀勁任鳴條，清品獨欣野趣饒。料得三餘無個事，丹青更把遠山描。

**新正發筆** 乙卯（75）

夜雨送年來，朝暉向人晚。芙蓉樹尚枯，陽雀聲先囀。漫步庭之階，東風輕且軟。揚眉顧八荒，渺渺江天遠。

**靈峯覓句** 三月

也曾幾度登華蓋，鴻爪雪泥印記空。又上靈峯情不淺，頻搔短髮語難工。已吹天籟吹人籟，未學陶翁學醉翁。謝屐山頭遙縱目，蕎麥處處笑春風。

**夢中題畫**

白黛仙人捧玉盆，秋波欲轉已銷魂。是誰揮動如椽筆，寫出中天月一痕。

**截流**

截流蓄九龍，鯨業又重逢。未許季冬閒，移山興正濃。

**絕句之一**

逢政焚坑上蔡斯，洪楊忌恨石韋資。機心雖巧終何用，魄化灰飛事可悲。

**詠雪**

客邊二十年，初見此花旋。節序冬霜冷，容姿柳絮妍。會歸垃圾地，猶舞混茫天。若以方殘甲，玉龍亦可憐。

**春望** 丙辰（76）驚蟄已過二日，尚未聞雷。

杖頭大塊好文章，膩面春風泛婉香。邱壑有請哀艸綠，煙光  
無賴遠天蒼。幾間白屋臨江曲，一列青山接故鄉。震蟄驚雷  
何日奮，芸芸含意特昂揚。

### 生機

生機無盡又逢春，蘗發斫餘特地新。猶勝昔年花夢好，一枝  
曲屈一杖伸。

生機無盡喜清明，蘗發斫餘百有情。猶勝昔年春夢好，一枝  
斜上一枝橫。

### 夢謁妣劉

一自人天隔，哀哀四十秋。慈顏空孺慕，賤蔚尚籬幽。昔缺  
茅雞供，今無胤扇留。何期清夢裏，謁母故山邱。

### 絕句之二

梟如掛角身能下，識過東都首可全。珍從來年已及，雖無  
榮寵亦無愆。

### 絕句之三

祖龍當日氣吞江，煬鼠殘狂世絕雙。誣古不成除棘晚，鐵輪  
自作自難扛。

### 丙辰除夕

申來布履辰青氈，江畔席門二十年。隨俗迎送屢不鮮，煨榾  
柮聽薪火傳。乃今除夕意轉多，天時人事並堪歌。地裂山崩  
海揚波，死者已死生奈何。自昔青牛騎向西，赤縣即已墮泥  
犂。千載春陵同此蹊，蘇張竟詡証菩提。我名辭歲實迎春，  
至願天下人為。來者可追敝則新，默識心通蜀之岷。

### 彤雲歌 丁巳（77）春

彤雲塞空兮六合昏，五嶽動搖兮雷雨噴，羲和曷興兮朝日暉。

### 書老子大義後

讀老四十年，注箋再三替。初名老子解，後乃名大義。顧名知所趨，所趨在真諦。深入入微茫，含咀到虛字。有時阻重山，險道難為繼。及至過崎嶇，忽又新天地。桃李自成春，龍飛鳳舒翅。寥寥乘長風，海闊天無際。道尊德至貴，海天何足譬。超顯而燭隱，名言本難事。回思三紀勤，感歎聊伸意。吾與道俱尊，何嫌帚之敝。

### 雨霽西郊

雲開雁足展江城，滿目秋光趁野行。雜樹蕭疏仍作態，小邱隱秀不知名。幾多暑氣金風淡，一派真珠草色明。踏過斷橋溪水綠，苔香陣陣祝年成。

### 曳尾

曳尾泥途歲屢周，雲龍風虎氣仍遒。雕成楮葉寧無用，凝得冰心豈憚秋。投老益堅頻擊楫，未歌先斂一登樓。煙波如海勞蒿目，侮石雖勤誓不休。

### 南泉紀遊

丁巳季秋，初訪南泉，拾級蕩槩，亦雨亦晴。雖遲留不及半日，而興致與昔年北泉之遊異矣。

對境无心曾北碕，探幽得意偶南泉。微陽散雨來山路，小鳥鳴條度翠煙。隔世仙人空有洞，垂岩藤蔓已如椽。黃花集團清風入，斑鬢方舟細浪旋。畫水不求留履迹，淩虛直欲上雲天。歸歟命駕揮長策，率爾操觚記短箋。

### 立春沐浴

洗去全身垢，迎來滿面春。滄浪漁父曲，遠韻足精神。

### 除夕得純直高考錄取通知

長年蹭蹬祇身親，此夕如何笑語頻。太學曾經真碌碌，小兒僥倖故諄諄。

### 書蜀僑畫頁後

樂君作畫我題詩，三十年間兩個癡。拈斷數莖无好句，春山一抹最多姿。

### 觚哉

秀才雖秀不知書，九品中正貴顏朱。關節不到號閻羅，近水樓臺安且都。才高八斗非君子，禮順人情真丈夫。考乎舉乎過場乎。觚哉觚哉觚不觚

### 儒林外史人物雜詠十五首

滴滴鮮荷滾露珠，參軍沒骨畫真殊。切雲屈子人莫識，獨駕中車學古儒。（王冕）

馬二先生井底蛙，居然尤悔吐奇葩。買棺助葬紆匡困，一片熱腸亦可嘉。（馬靜）

孝親敬友本來高，隨俗浮沉始玷操。莫怪潘三奸吏猾，須知小慧壞兒曹。（匡迥）

宦海由來出虎狼，獨于向鼎費平章。試看鮑子梨園客，生死交情乃爾長。（向鼎）

貢院傷心叩賈人，賣雞聞捷現元神。相憐同病薪傳火，依樣周公范禮荀。（二進）

貢生何如與監生，奸吝難為兩弟兄。園裡留豬兒繼產，一莖燈草妾知情。（二嚴）

何德何仁彼舅王，義形于色正綱常。但將表面撕開看，兩百紋銀裡面藏。（二王）

婁三婁四俗而愚，納士招賢亦已劬。題額潛亭光應暗，寧王成祖議仍粗。（二婁）

慎卿易辦少卿艱，糞土黃金戚友間。賣了田園如建業，湖山相對粲朱顏。（二杜）

萬萬不慈王玉輝，矯情殺女內心違。尋親失養終非孝，郭子



徒勞抱骨歸。（玉郭）

雲仙植樹化青楓，湯奏征苗建狗功。如意事成隨失意，江山自古賺英雄。（蕭湯）

女中豪傑沈瓊枝，鶴立雞群志可師。游戲塵寰憑自力，快人更有鳳鳴岐。（沈鳳）

名雖勿用實藏奸，鐵臂豬頭一例看。牛浦布衣原撲朔，憨仙過計教燒丹。（四騙）

遲莊虞武氣相求，難比叔孫國士儔。泰伯蒸嘗成底事，水流花謝兩悠悠。（四迂）

瑤琴一曲製天衣，寄興圍棋此賈稀。字不足奇奇善罵，茶餘憑吊送斜暉。（四隱）

### 生日新號乙杉（五十六周歲）

祖生今日歸天去，蜀相前年轉世來。莫笑乙杉无所肖，老枝猶可撥雲開。祖逖五十六牢，孔明五十四薨。

### 有問 書劉君“讀師卦”一文後

問君何事說師貞，寧見丈人不狗烹。田有鸛禽无咎否，輿尸弟子孰能更。

### 除日寄興

白屋晨雞唱，黃柑斗酒渾。詩腸饒鼓吹，阮目許輪翻。有帽隨風落，无裘負日暄。舊符更草澤，新夢入桃源。身老心猶壯，情深意頗軒。天行一已過，和氣掃煩冤。